

Implementasaun Objektivu Dezenvolvimentu Sustentável iha Timor-Leste: Rekomendasaun ba governu foun VIII Governu Konstitusionál husi República Democrática de Timor-Leste

31 Marsu 2018

Jerry Courvisanos

- Professor Associado de Inovação e Empreendedorismo, Federation Business School, Federation University Australia, Mt Helen Campus, Ballarat, Victoria, Australia
- Professor Visitante 2016, Centro Nacional de Investigação Científica (CNIC), Universidade Nacional Timor Lorosa'e (UNTL), Dili, Timor-Leste
- Research Scholar, Binzagr Institute for Sustainable Prosperity, University of Missouri-Kansas City, Kansas City, Missouri, USA

Saida mak Objektivu Dezenvolvimentu Sustentável (ODS) no Tansá iha Timor-Leste?

Timor-Leste nia governu foun VIII Governu iha oportunidade atu fó atensaun urjente hodi implementa Objektivu Dezenvolvimentu Sustentável (ODS) ne'ebé VI Governu anteriór aprova iha fulan Setembru 2015, hodi halo kompromisu atu implementa. Husi tempu ne'ebá progresu atu realiza ODS la'ó neineik liu. Governu foun neineik atu implementa ODS maski primeiru-ministru anteriór advoga maka'as ida-ne'e hodi fó instrusoins esplísitas ba ministru hotu atu haree oinsá bele implementa ODS ne'e, nia mós forma ekipa ka grupu de traballu iha Gabinete Primeiru-Ministru nian ne'ebé dedikadu atu implementa ODS. Avaliasaun kona-ba progresu ne'ebé neineik atu implementa ODS bele hetan iha relatóriu detalladu ne'ebé ha'u halo durante ha'u-nia estadia ba fulan neen iha UNTL iha 2016 no kuandu ha'u vizita fali iha Jullu 2017. Relatóriu ne'e bele hetan online iha La'ó Hamutuk nia sítu, iha:

<https://www.laohamutuk.org/misc/TLA2017/CourvisanosSDGRoadMapReportJul2017a.pdf>

Iha fulan Setembru 2015, nasaun 193 hotu ne'ebé iha Nasoins Unidas (ONU) nia okos sai signatáriu ba Ajenda ODS nian. Ajenda akordada ne'e estabese alvus 169 husi objetivus 17 nia laran nu'udar baze ne'ebé luan ba ODS ne'e. Ita bele hetan dezenvolvimentu sustentável bainhira kumpre objetivus 17 ne'e atu halakon situasaun kiak, fó saúde di'ak no edukasaun di'ak, no mós, hodi fó empregu, igualdade, pás, no hodi garante katak ita-nia planeta ho ninia sistemas naturais hotu la hetan tan estragus no abuzus. Informasaun kompletu kona-ba ODS 17 ne'e, bele hetan iha ONU nia sítu, iha:

<https://sustainabledevelopment.un.org/sdgs>

Iha ONU, Timor-Leste mak lidera grupu husi nasoins frájeis (naran 'g7+') atu sertifika katak objetivus kona-ba pás, estabilidade, no instituisoins efetivas (ODS #16) inklui totalmente iha planu dezenvolvimentu ne'e hodi hato'ó redasaun detalladu atu esplika alvus ne'ebé iha relasaun ho países kiak ne'ebé em dezenvolvimentu. Timor-Leste (TL) nu'udar signatáriu ba Rezolusaun ONU nian kona-ba ODS halo kompromisu atu "estabese ninia alvus nasionais rasik tuir ninia ambisaun iha nivel globál, maibé hodi haree sirkunstáncias nasionais" no hodi garante katak alvus ne'ebé espesifika iha rezolusaun ne'e mós sai "inkorporadu iha prosesus planeamentu nasionál, polítikas, no estratéjias".

Iha lora 23 Setembru 2015, Governu TL adota ajenda kona-ba ODS ho hakarak atu realiza objetivus ne'e to'ó tinan 2030. Governu kria roteiru ida nu'udar "mapa" atu bele "armoniza" ODS ho Planu Estratéjiku Dezenvolvimentu nian (PED) ne'ebé estabese ona ba 2011-2030. Estratéjia ne'e hetan apoiu maka'as husi membru governu tomak no husi maioria membru iha Parlamentu. ODS ne'e mak modelu ida kona-ba dezenvolvimentu "boot" ne'ebé mak atu masimiza kreximentu ekonómiku, ne'ebé kontribui atu rezolve kestoins sosiais no ambientais.

Eis-presidente, José Ramos-Horta, fó sai dilema ka buat ne'ebé halo susar atu halo tuir roteiru ne'e, hodi dehan katak maski TL nasaun ida iha mundu ne'ebé depende liu ba petróleu no gás, maibé buat ne'ebé TL preziza mak "...modelu ekonómiku alternativu oiain, ne'ebé vitál ba impulsu globál ne'ebé aumenta ba beibeik atu uza enerjias renováveis, hadook an husi kombustíveis fósseis, no toma asaun urjente kona-ba mudansa klimatika". Iha TL, iha organizasaun balu ne'ebé hala'odezenvolvimentu komunitáriu ne'ebé fó alternativa balu hanesan ne'e, maibé organizasaun sira-ne'e ki'ik de'it no diversas, sira la iha masa crítica ka buat ne'ebé preziza atu bele hasai TL husi pobreza ka situasaun kiak. Apoiu no insentivu ne'ebé organizasaun sira-ne'e hetan husi TL nia governus anteriores mak limitadu tebes tanba governus

sira-ne'e konsentra liu mak ba kreximentu ekonómiku rápidu. Governu haree dezvoltimentu komunitáriu ne'e hanesan buat ne'ebé neinek liu atu fó lukrus no atu kria empregus.

Oinsá mak VI Governu Konstitusionál fó atensaun ba ODS ne'e?

Governu anteriór mós uza roteiru ne'e nu'udar baze atu bele alkansa projetus dezvoltimentu boot ne'ebé kurtu prazu ba TL, maibé dezvoltimentu sustentável (liuhusi ODS) ne'e sai fali objetivu ba longu prazu. PED identifika objetivus 32 ba dezvoltimentu sustentável, no ida-ne'e fornese ligasaun ne'ebé "armoniza" ho ODS ne'e. Liuhusi PED ne'e mak TL bele halo gastu boot ba infraestrutúra, no mós estabese regulamentus ba deklarasaun kona-ba impaktu ambientál no ba enkuadramentu legál. Rezultadu husi buat hirak-ne'e klaru, ema hotu bele haree. Maski nune'e, governu anteriór hasoru difikuldades signifkativas ne'ebé teri netik país ne'e atu diversifika ninia ekonomia hodi bele hadook an husi dependénsia ba indústriá kombustiveis fósseis. Aleinde ida-ne'e, governu haree katak susar halo progresu atu kumpre akordu ne'ebé halo ona kona-ba ninia alvus sosiais no ambientais.

Dezde independénsia, maski iha dezvoltimentu kona-ba kombustiveis fósseis no obras konstrusaun, maibé ladún iha dezvoltimentu ekonómiku doméstiku. Dependesia ba importasaun kontinua aumentu, ho la iha mudansa iha ekonomia nia estrutúra. TL hetan avansu komersiál ne'ebé ki'ik tebes iha agrikultura, ospitalidade, fabrikasaun, komérsiu, transporte, no imóveis. To'ó agora mós PED seidak hetan modifikasaun husi tempu ne'ebé TL adota. Desde simu rezolusaun kona-ba ODS, husi tempu ne'ebá iha informasaun foun barak kona-ba situasaun kiak ne'ebé sei grave nafatin, kona-ba problemas ne'ebé kontinua aumenta tanba mudansa klimátika, no kona-ba produsaun agríkola ne'ebé kontinua fraku tebetebes. Desentralizasaun sai husi Dili hetan ona susesu uitoan iha projetu balu atu dezvoltive komunidadade sira ne'ebé ki'ik, no administrasaun rejionál mós liu faze "deskonsentrasaun" maibé ladún iha melhoria jerál signifkativa kona-ba igualdade servisus no ladún iha kontribuisaun husi munisípius. Liután ne'e, maski liña de ministériu ida-idak simu diretrís ida atu iha prioridades ne'ebé aliñadu ho ODS hotu, maibé sira nafatin ladún fó atensaun ba ida-ne'e. Nu'udar rezumu, ladún iha revizaun imparsiál ba PED no ba ninia ligasaun ho kompromisu ODS nian. Ha'u-nia relatóriu hatudu katak ladún iha "armonizasaun". Nudar efeitu, governu só fó atensaun ba ODS iha prosesu halo orsamentu anuais, *hafoin* estratejia polítika PED nian implementa ona.

Governu anteriór halo esforsu balu ne'ebé hatudu movimentu uitoan ba dezvoltimentu sustentável. Ne'e notavel liuliu iha *Ministério de Coordenação de Médio Prazo* (MECAE) ne'ebé responsavel ba polítikas ekonómikas ne'ebé la'ós parte husi projetus boot kona-ba infraestrutúra. MECAE iha komitmentu maka'as atu bele kria ambiente negósiu ne'ebé fó insentivu ba investimentu privadu no atu dezvoltive esportasaun naun-petrolífera husi agrikultura doméstika, silvikultura komunitária, no mós, husi esportasaun kafé, hanesan fó sai iha ha'u-nia relatóriu kompletu.

Ita bele konklui katak progresu ba dezvoltimentu sustentável mak sei limitadu tebes. Realizasaun efisiente kona-ba ODS la'ó neinek tebetebes. Liután ne'e, governu haree kada ODS ho ninia alvus relasionadus hanesan kaixas ne'ebé presiza marka hodi tau vistu de'it iha roteiru lineár ida, ne'ebé sai husi dalan ida tama ba dalan oioin. Maibé, duké halo ida-ne'e, hanesan Nasoins Unidas prevee, ita presiza haree ODS 17 ne'e nu'udar parte "integradu no labele haketak" iha roteiru dezvoltimentu nian. Ne'e signifika katak ita hotu moris hela iha sistema ida naran Mundu-raiklaran ka planeta "terra" no katak la viavel atu haketak objetivu ka alvu ida-idak hanesan buat ida ne'ebé individuál, ne'ebé bele identifika, ne'ebé bele realiza, no ne'ebé bele tau vistu de'it bainhira realiza ona. Porezemplu, hodi aumenta gastus ba dezvoltimentu petróleu no gás atu bele kria empregu, ne'e bele halo susar atu hetan bee moos besik rejiaun ne'ebé halo dezvoltimentu ne'e, no bele mós halo susar ba fetu sira atu hetan oportunitades iha rejiaun ne'e. Tan ne'e, atu bele halo progresu iha implementasaun ODS hotu, ita presiza haree objetivus ne'e hanesan sira hotu interligadu.

Saida mak dezafiu ne'ebé VIII Governu Konstitusionál hasoru atu bele implementa ODS ne'e?

Dezafiu ba TL nia governu foun, ba Parlamentu foun, no ba servidores públikus ne'ebé serbí TL nia governu foun mak rekoñese katak dalan ne'ebé governu anteriór fó atensaun atu implementa ODS ne'e seidak lori rezultadu di'ak no hamosu limitasoins barak. Hodi kontinua iha dalan hanesan ne'e, katak

hodi halo tuir de'it PED, no hodi ladún halo mudansa ruma kona-ba oinsá atu implementa ODS, ida-ne'e sei lori konsekuénsias ladi'ak, ne'e mak sei iha fallas ba beibeik. Iha eis-prezidente Taur Matan Ruak nia diskursu iha Parlamentu iha loron 20 Setembru 2016, nia fó sai governu anteriór nia fallas haat, ne'e mak dependénsia ba kombustiveis fósseis, ladún halo promosaun kona-ba rekursus nasionais, empregu la suficiente, no la iha partisipasaun husi sidadaun sira iha prosesu transformasaun. Fallas haat ne'e hatudu katak ladún iha atensaun ba ODS tanba governu nia foku úniku mak fó atensaun de'it ba PED no mós ba dezvoltimentu "boot".

Abordajen ba dezvoltimentu rekursus ne'ebé governu TL mak lidera, husi altu nivel ka husi leten ba kraik, no ne'ebé bazeia ba kompromisu forte ba PED, abordajen ne'e dependente ba TL nia rekursus petróleu no gás. Ida-ne'e kria problema oioin ne'ebé sériu ba ambiente natural globál liuhusi emisoin karbonu. Aumenta tan ho problema menus oportunidade servisu iha setór rekursu ne'e nian (oportunidade servisu barak liu mak ba ema estrajeiru sira ne'ebé ho kapasidade). Liu tan, petróleu no gás sei hotu ho lais tebes (menus iha fornimentu), no iha komitmentu husi China, no nasaun ekonómiku boot sira atu hakotu sira nia dependensia ba kombustiveis fósseis (menus iha ezijénsia) . Maibé, iha organizasoin naun-governamentais (ONGs), organizasoin sosiedade sivíl balu (OSC), no kooperativas oioin ne'ebé dedika an tebes atu hala'o dezvoltimentu komunitáriu ne'e husi kraik ba leten. Organizaun sira-ne'e fó apoiu maka'as ba agenda ODS, liuliu iha área saúde, edukasaun, no ambiente. Maski nune'e, dezvoltimentu komunitáriu ne'e, hanesan hatete ona, ladún hetan apoiu husi governu anteriór; governu hein de'it atu organizaun sira-ne'e mak halo serbisu todan ne'e mesak iha TL. Tan ne'e, iha modelu dezvoltimentu rua ne'ebé hala'o iha TL, modelu dezvoltimentu rua ne'e distintu no la iha ligasaun ba malu. Maski rua-rua apoia agenda ODS nian, maibé tanba sira ketaketak, ida-ne'e la viavel nu'udar estratéjias longu prazu ba dezvoltimentu sustentável ba país ne'e. Ne'e katak tenke iha mudansa ba foku.

Atu bele halo mudansa ruma kona-ba polítika ba dezvoltimentu sustentável, TL tenke adota ODS ne'e nu'udar konjuntu konsistente no integradu ho asoins fleksiveis no rezolusaun forte. Mudansa ne'e presiza inklui ODS nu'udar parte fundamentál iha dalan foun ba ekonómiku, sosiál, no ekolójiku. Atu bele halo mudansa ne'e iha opsaun rua. Opsaun prinsipál mak atu TL nia Governu foun toma inisiativa hodi modifika inkrementalmente ho kuidadu PED tuir alvus ne'ebé presiza ba ODS. Hanesan ne'e, bainhira to'o tiha tinan 2030, ODS no alvus husi PED ba dezvoltimentu ekonómiku diversifikadu sei besik liu atu realiza.

Maski nune'e, se TL nia Governu foun la halo reforma, opsaun alternativa mak atu masa krítika husi sosiedade sivíl toma inisiativa no halo mudansa radikál direta liuhusi movimentu kooperativu indíjena "fulidaidai". Movimentu ne'e tenke inklui setór hotu husi sosiedade, liuliu agrikultores, traballadores iha infraestrutur, konsumidores, no servidores públikus ne'ebé hetan treinu iha área urbana. Iha movimentu ne'e, fetu no joven sira, ne'ebé temi iha Konstituisaun TL, Seksoins 17 (mulheres) no 19 (juventude), em termos de direitos, deveres, no inisiativas, sira mak tenke hamriik iha vanguarda ka iha oin. Maibé, hodi tuir dalan ne'e bele halo susar liu atu mobiliza no organiza (no bele hamosu fallas no konsekuénsias oioin), duké tuir opsaun prinsipál iha ne'ebé governu mak lidera mudansa ne'e.

TL nia dalan ba dezvoltimentu, maski governu ka sosiedade sivíl mak lidera, tenke bazeia ba investimentu ezistente iha setór públiku. Hamutuk ho investimentu ne'e (hanesan investimentu ne'ebé fornese eletrisidade ba país tomak), tenke iha mós abordagem de compartilhamento pelos líderes do ODS atu promove partisipasaun iha nivel lokál husi agrikultores, jerentes de kooperativas, no empreendedores foun sira ne'ebé buka oportunidades ba atividade ekonómika tuir direasaun dezvoltiemntu sustentavel nian (exemplu eko-turismu no produsaun ai-han natural).

Matadalan ba mudansa boot ne'e tenkesér ODS ne'e rasik, *la'ós* governu anteriór nia roteiru ba ODS. Prosesu atu uza ODS nu'udar bússola (ka kompas iha lian malaiu) ba dalan foun ne'e tenke garante katak bainhira halo mudansa ba polítikas ekonómikas tenkesér halo ida-ne'e iha dalan ne'ebé sei prodús ekonomia forte diversifikada, ne'ebé la bazeia ba petróleu, hamutuk ho setór privadu ne'ebé bazeia ba lukru no ne'ebé viavel, no mós, ho apoiu finansa ne'ebé práttiku no forte ba setor social. Ne'e katak atu bele halo mudansa iha dalan ba ODS presiza pequenos passos hakat ba hakat.

Progresu pozitivu hakat ba hakat iha dalan ba ODS ne'e, no ne'ebé dook husi "armonizasaun", bele haree ona iha dezvoltimentu ekonómiku balu iha TL laran ne'ebé aborda direktamente ODS iha forma radikál. Hakat ida-idak maski ki'ik lori rezultadu di'ak tanba halibur ema hamutuk husi divizoins polítikas no ekonómikas oioin iha país atu bele realiza ODS. Ne'e katak ODS ne'e bele unifika país tomak. Ba dezvoltimentu ne'e prezisa atores impulsadores ne'ebé forte husi leten ba kraik, hanesan husi governu sentrál, no organizasoins multilaterais [porezemplu, Banco Mundial] to'o doadores governamentais [porezemplu, Ministériu Negósius Estranjeirus husi Austrália], no impulsadores husi Investimentu Esternu Diretu ne'ebé bazeiadu lokalmente [porezemplu, *Deloitte* no *TradeInvest*]). No iha mós forsa impulsora husi organizasoins ne'ebé halo dezvoltimentu komunitáriu, hanesan ONGs, OSCs, no movimentus kooperativus. MECAE nia atividades hatudu katak iha *ponto de encontro* iha klaran, iha ne'ebé parte leten no parte kraik bele serbisu hamutuk ba dezvoltimentu hodi tuir matadalan husi ODS. Ida-ne'e mak "armonizasaun" ne'ebé loos husi modelu dezvoltimentu rua ne'e, katak dezvoltimentu "boot" no dezvoltimentu komunitáriu.

Iha verdadeiru espíritu "armonizasaun" nian, TL nia Governu foun bele analiza reformas sujeridas tuirmai ne'ebé tuir dalan ba ODS. Sujestaun hotu ne'e husi peskiza ne'ebé ha'u halo ba ha'u-nia relatóriu. Sujestaun hotu ne'e prezisa harii ka konstrói...

- (i) desentralizasaun partisipatória, hodi halo desizoins loloos hamutuk iha rejioins ka distritos;
- (ii) aprendizajen formál lokál no aprendizajen prátika (ba agrikultores, jerentes kooperativas, traballadores temporáriu sazónais, empreendedores promissores);
- (iii) sistema finanseiru ne'ebé apoia inovasoins ba dezvoltimentu sustentável ne'ebé tipu iha lista (iv)-(ix) iha kraik ne'e;
- (iv) agrikultura sustentável hodi sai boas prátikas agríkolos no hadook an husi subsisténsia;
- (v) produsaun ai-han lokál hamutuk ho prezensa forte iha merkadu;
- (vi) merkadu iha área eko-turizmu hodi hadook an husi aventura turizmu limitadu;
- (vii) turizmu istóriu ho ligasoins doméstikas no estranjeiras kona-ba memória husi TL nia pasadu, hanesan tempu koloniál, Funu Mundiál II, rezisténsia ba okupasaun no violénsia);
- (viii) ONGs lokais ne'ebé forte hodi halo parseria ho doadores estranjeirus no especialistas kona-ba negósiu; no mós,
- (ix) fabrikasaun sustentável husi estadu no husi setór lokál privadu hamutuk ho investimentu esternu diretu ho apoiu husi rekizitus deklarasaun kona-ba impaktu ambientál ne'ebé forte.

Buat sira ne'ebé temi iha leten ne'e nu'udar ezemplu de'it kona-ba oinsá governu no comunidade bele serbisu hamutuk nu'udar ida de'it atu fornese atividade inovadoras oioin ne'ebé kontribui atu bele alkansa ODS. Buat ida de'it ne'ebé komún ho ezemplu hotu ne'e mak prezisa hadook an husi dependénsia ba indústria kombustiveis fósseis insustentável. Duké ida-ne'e, TL prezisa halo mudansa ba áreas ne'ebé iha forsa kompetitiva ho potenciál atu bele transforma setores ekonómikus viáveis ho sustentabilidade sosiál no ambientál. Setores ne'e tenkesér setores sustentáveis husi ekonomia ne'ebé bele atende nesidades loroloron nian ba populasaun lokál no vizitante hodi fornese servisu no beins ka sasán nesésáriu.

Tanbasá mak Timor-Leste tenke simu ODS nu'udar matadalan ba futuru?

ODS tenke sai nu'udar estímulo ba inovasaun ne'ebé jera empresas privadas no sosiais favoráveis ba meu-ambiente (naran eko-inovasaun). Empresas tipu rua ne'e bele fornese baze atu hasoru setór públiku ne'ebé relativamente boot ne'ebé governu mak lidera. Dezigualdade ne'ebé mosu husi setór privadu bele sai ekilibradu liuhusi empresas sosiais no kooperativas ne'ebé adapta no pratika. Ekilíbriu ne'e sei funciona hodi kontra komportamentu ganansiozu no naun-transparente atu domina atividades ekonómikas iha TL. Porezemplu, kompañia privada ne'ebé halo prosesamentu kafé, *Timor Global*, ho ninia kadeia suprimetus nian, sira serbisu hamutuk ho ONGs hodi prodús no distribui suplementu ba labarik sira ho vitamina naran *Timor Vita*. Kompañia *Timor Global* mós dezenvolve daudaun kadeia suprimentu sustentável ho kaféikultores (agrikultór kafé) iha munisípiu Ermera.

Dalan alternativu ba eko-inovasaun ne'e, ne'ebé temi iha leten, atu bele funciona ho di'ak, iha rekizitu ida de'it, ne'e mak atu partisipantes hotu iha prosesu dezvoltimentu halo tuir "regras estrada" ne'ebé

estabelese ona hodi orienta komportamentu. Rekizitu ne'e komesa bainhira governu asume lideransa hodi estabelese nain ba rai ho efetivamente, halakon burokrasia no hodi la tolera korrupsaun. Atu ekonomia bele viavel, tenke iha protesaun legál kona-ba propriedade no kontratu, liuliu ba atividades empreendedoras, hanesan propriedade sosiál konjunta iha kooperativas ka protesaun direitus individuais. Estrutura sira-ne'e kontribui atu oportunidades sira-ne'e bele buras ho kreximentu. Empreendedorizmu mak kona-ba oportunidades, maibé susar atu aproveita oportunidade sira-ne'e bainhira la iha protesaun legál de direitus tanba risku altu husi empreendimentus ne'ebé inisiante ka foun. Aleinde ida-ne'e, regras ne'e tenke estabelese liuhusi prosesu governansa inkluzivu ne'ebé inklui valores tradisionais ne'ebé apoia prinsípius ODS nian. Nune'e, akordu entre relasoins de podér (hanesan elite husi governu/servidores públikus ho katuas lisan nian), fundamentál tebetebes atu kualkér dalan alternativu jenuinu atu bele alkansa ODS.

Iha país foun hanesan TL, iha nesesidade boot ida atu fó assisténsia ba emprezárius no jerentes kooperativas nian hodi orienta sira liuhusi "regras estrada" foun hotu ne'ebé hanesan labirintu. Iha nesesidade atu fornese konsellu ba mentores, no mós identifikasaun de ideias, fó ba sira rede kontaktus no instalasoins inkubasaun ba empreendimentus de arranke no kooperativas. Provizoins ne'e Câmara de Comércio e Indústria de Timor-Leste (CCITL) mak realiza, maibé atu bele halo ida-ne'e CCITL tenkesér dotada ho rekursus no promovida di'ak liután. Presiza finansas ba arranke no kreximentu kontínuu ho forsa kompetitiva ne'ebé aborda ODS, tanba ida-ne'e limitasaun boot ida iha sistema ezistente ne'ebé tenkesér superadu. Iklusliu, hodi konstrói konexoins lokais fortes no redes entre instituisoins finanseiras, universidades, asosiasoins, redes, meios de komunikaun no orgauns reguladores, ne'e sei ajuda atu bele fó apoiu ba atividades foun ne'ebé arriskadas.

Kestaun ne'ebé kontinua nafatin mak oinsá atu bele komunika ho efikás ba komunidadas hotu iha TL kona-ba nesesidade atu ODS sai parte vitál iha ema hotu nia laran no neon. Komunikaun ne'e, no asaun ne'ebé tuir ida-ne'e, tenke envolve grupu rua iha sosiedade TL ne'ebé iha pasadu ladún fó kontribuisaun ba desizoins ne'ebé halo iha país. Grupu sira-ne'e mak juventude ne'ebé konstitui maioria husi populasaun (no ne'ebé agora iha membrus husi partidus polítikus iha Parlamentu), no mós feto sira ne'ebé tradisionalmente exkluídas husi papéis iha prosesu desizóriu formál no lisan nian (maibé abordadu daudaun ho igualdade husi membrus Parlamentu).

Jovens no feto sira mak fundamentál iha dalan foun ne'e atu bele realiza ODS nu'udar parte husi moris loroloron nian. Jovens ka juventude, ne'ebé iha países em desenvolvimento bolu sira nu'udar "joven ne'ebé tropa boot", mak grupu boot ida ne'ebé tenkesér inklui iha diálogu hotu kona-ba sira-nia país nia dalan ba futuro. Jersaun joven iha mundu tomak mak promove fortemente kestaun kona-ba sustentabilidade iha esfera ka áreas sosiál, ambientál, no polítika. Feto sira, em termos igualdade de jéneru, mak kestaun krusiál ida ne'ebé presiza ba desenvolvimento hodi fó ba sira kapasitasaun ekonómika, sosiál no polítika. Feto sira presiza hetan kbiit atu bele hatudu sira-nia ajénsia rasik no atu bele halo halo rasik "sira-nian sasan". Ezemplu ida ba países kiak ne'ebé em desenvolvimento kona-ba kapasitasaun ne'e ba fetu sira mak halo promosaun no fó apoiu ba empreendedorizmu femininu hodi fasilita prosesu kreximentu, no mós família nia papél atu fó apoiu ba atividade negósiu ne'e.

Dalan ka caminho alternativu ne'e bele sai realidade iha TL tanba buat ne'ebé unifika país ne'e, husi leten ba kraik, husi oeste ba leste, fetu no mane, mak "identidade sívika komún" ezemplifikada iha TL iha dalan oioin, maibé partikularmente liuhusi votasaun ba autodeterminasaun iha 1999. Akadémiku polítika publika iha UNTL, Victor Soares, deskreve valór síviku ne'e nu'udar sentidu revolusaun kontínua ne'ebé komesa husi jersaun antiga iha "luta para libertar o país" no ne'ebé kontinua liuhusi jersaun foun iha "luta para libertar o povo". Soares hatete: "Agora, luta atu liberta povu husi pobreza no analfabetizmu sai preokupasaun boot ba Estadu no ba povu Timor tomak."

VIII Governu Konstitusionál tenke lidera luta ne'e no rejeita alternativa ne'ebé Victor Soares bolu nu'udar "revolusaun baruk-teen" iha ne'ebé ema hotu konsidera dezafiu ne'e difisil tebes no defende de'it pozisaun kona-ba desenvolvimento insustentável ne'ebé eziste daudaun. Detalhes ezatus kona-ba oinsá atu implementa dezafiu ODS nian depende de'it ba TL nia governu foun ho ninia kapasidade atu halibur hamutuk TL nia povu tomak iha viajen inspiradora ne'e.